

樂

府

廣

序

樂府廣序目次 卷之十七

漢雅 二

橫吹曲辭 四曲

出塞

隴頭歌 三章

樂府廣序目次

卷之十七終

樂府廣序

卷之十七

浙西止谿園人朱嘉徵論正

漢雅二

橫吹曲辭

四曲

樂府漢橫吹曲二十八解李延年造魏晉以來唯傳十曲。一曰黃鵠。二曰龍頭。三曰出關。四曰入關。五曰出塞。六曰入塞。七曰折楊柳。八曰黃覃子。九曰赤之揚。十曰望行人。後又有關山月。碓陽道。長安道。梅花落。紫騮馬。聽馬。雨雪。劉生。八曲。合十八曲。其辭並亡。惟出塞一曲。樂府載云古辭。

序曰。橫吹曲鼓吹之別部也。初隸在鼓吹。馬上奏之。爲軍中樂。蓋壯。諸國皆馬上作樂。自漢興以來。諸壯部樂。總歸鼓吹署。後分二部。簫笳爲鼓吹。用之朝會。及行駕作。亦以給賜焉。鼓角爲橫吹。用之軍中。馬

上所奏者也。晉志：橫吹有鼓角。□角，鼓角者，周禮以鼗鼓鼓軍士是也。始蚩尤氏與黃帝戰于涿鹿之野，帝命吹角爲龍吟以禦之。後魏武北征，烏桓越沙漠，而軍士思歸，于是減爲半鳴，尤悲。□角者，張博望入西域傳其法于西京，唯得摩訶兜勒二曲。李延年因□曲更造新聲二十八解，乘輿以爲武樂。後漢以給邊將軍，和帝時萬人將軍得用之。魏晉以來，二十八解無復存者。而世所用者，黃鵠、龍頭、出關、入關、出塞、入塞、折楊柳、黃華子、赤之陽、望行人等十曲。今其辭亡。又有關山月八曲，後世所加也。後世乃以昭帝黃鵠歌爲黃鵠本辭，亦屬傳會。北史：後魏有歛邏迴歌。

爲廟樂其曲多可汗辭今亦不傳燕魏之際鮮卑歌  
難曉解此大角曲也余按樂府梁鼓角橫吹曲多序  
慕容垂及姚泓時戰陣之事其曲有企喻等歌三十  
六曲樂府□吹舊曲又有隔谷等歌三十曲總六十  
六曲未詳所用自隋以後始以橫吹用之鹵簿與鼓  
吹列爲四部總名鼓吹並以供大駕及皇太子王公  
云一曰柷鼓部柷鼓金鉦一曲夜警用之大鼓十五  
曲小鼓九曲大角七曲其辭並本鮮卑二曰鐃鼓部  
凡十二曲三曰大橫吹部凡二十九曲四曰小橫吹  
部凡十二曲夜警亦用之曲辭並佚矣漢橫吹曲存  
闕文詩一章遺歌三章魏辭並闕說見六朝曲中

# 出塞

晉樂志出塞入塞曲李延年造

候騎出甘泉奔命入居延旗作浮雲影障如明月弦

郭氏樂府載古辭左本同

解題唐有塞上塞下曲

出此

西京雜記高帝戚夫人善鼓瑟擊筑又爲翹袖折腰之舞歌出塞入塞望歸之曲曹嘉之晉書劉琨嘗避亂塢壁賣口百數欲告之曉無懼色接笳而吹之爲出塞入塞之聲以動其遊客之思于是羣口皆垂泣而去

序曰橫吹曲歌出塞天子守在四裔也古者采薇治外防秋爲急按漢世備邊謹斥候之一略見當時邊將防禦之策亦整而暇矣似古辭闕文六代人往往倣此譜曲

隴頭歌 三章

隴頭流水。流離四下。念吾一身。飄然曠野。

樂府作念我行役。四句下有登高望遠。涕零雙墮。今從樂府。

朝發欣城。暮宿隴頭。寒不能語。舌卷入喉。

隴頭流水。鳴聲幽咽。遙望秦川。心肝斷絕。

樂府右三曲。曲四解。載梁鼓角橫吹曲。後左本闕。樂錄漢曲有隴頭而亡其辭。三曲或其遺也。梁鼓角橫吹亦載此。

序曰。橫吹曲歌隴頭三章。閔征戍也。美王者卹民情道之歌咏。



樂府廣序

卷之十七終

男

爾邁謹訂

樂府廣序目次 卷之十八

漢雅三

雅舞歌辭 一曲

武德舞歌

樂府廣序目次

卷之十八終

樂府廣序

卷之十八

浙西止谿圃人朱嘉徵論正

漢雅三

舞曲

序曰今舞之不傳蓋久矣孔文舉表云激楚陽阿至妙之容鄭漁仲通志謂與六笙同無聲歌當時工師以譜奏相授者近是余讀傅武仲舞賦序歌以詠言舞以盡意夫咸池六英所以陳清廟協神人也鄭衛之樂所以娛密坐接懽欣也適心知其所以而考之六藝之文則舞有二名曰雅舞曰雜舞夫舞者容也容以象德故王者以揖讓得天下者先文舞以征伐

得天下者先武舞而吳季札觀樂見舞象箠南籥者  
曰美哉猶有憾見舞招徠白德至矣哉且舞以象成  
者也雲門而下其名存其容亡獨大武之制可考武  
始而壯出至六成復綴以崇天子樂記曰武王之事  
也隋制雅樂其舞亦六成云舞又以明功功大者賜  
之樂昔成王以周公有勲勞命魯公世世祀周公以  
天子禮樂升歌清廟下管象舞朱干玉戚冕而舞大  
武皮弁素積裼而舞大夏以廣魯于天下也是謂雅  
舞用之朝廷者周禮樂師掌教國子小舞宴私亦用  
之梁武帝嘗報沈約書裨鐸巾拂古之遺風上世樂  
飲酒酣必自起舞漢武帝樂飲長沙定王起舞是也

復以舞相屬所屬者代起舞漢灌夫起舞以屬田蚡  
晉謝安起舞以屬桓嗣是也詩云屢舞仙仙曰示譏  
爾何譏乎譏其屢舞也干舞又何譏焉是謂雜舞上  
下宴會通用之者周用六代之樂雲門大咸大韶大  
夏文舞也大濩大武武舞也又有六舞以教國子曰  
帔舞羽舞皇舞主祀祭旄舞干舞此兵舞也人舞無  
所執以手袖爲威儀秦本紀改大武舞曰五行餘因  
革不傳漢制雅舞者文武二舞也太祖廟奏武德文  
始五行之舞太宗廟奏昭德之舞世宗廟奏盛德之  
舞三舞無歌光武帝廟奏文始五行武德之舞東平  
王蒼獻其辭載集中魏受禪改武德舞爲武頌文始

舞爲大韶五行舞爲大武仍其初名也武帝廟奏武  
始舞文帝廟奏咸熙舞烈祖廟奏章斌舞三舞無辭  
所傳者昭武舞歌蓋改漢巴渝舞也四篇述魏德並  
于太祖廟奏之主祭辭雲翹育命之舞漢迎氣于五  
郊也魏改雲翹舞爲鳳翔育命舞爲靈應無曲辭雜  
舞者公莫巴渝樂舞鞞舞鐸舞拂舞白紵也初見于  
方俗後寢陳于殿廷如漢拂舞曲也鞞舞五曲章帝  
辭其文闕略多謬誤陳思王改作新歌五篇以通古  
曲而周又有纓樂散樂秦漢加廣焉宴會所奏率非  
雅舞別見散樂論中魏晉流風並以四舞用之宴饗  
宋武帝大明中亦以雜舞合之鐘石施于朝廷朝會

樂則別奏之明帝又有西僖羗□雜舞後魏壯齊亦  
皆參以□戎伎從此諸舞彌盛抑彌衰矣隋牛弘疏  
請存四舞宴會則與雜伎同設于西涼前奏之去鞞  
拂舞人無所持近人舞也夫舞之不傳蓋久矣而傳  
武仲所歌嘉闢雖之不淫哀蟋蟀之局促殆庶幾乎  
嗟夫德之旣斁容豈能留于萬一哉古六舞無辭雅  
舞之有歌辭自東漢武德舞始也雜舞之有歌辭自  
聖人制禮樂篇見鐸舞公莫舞歌見巾舞淮南王篇  
見拂舞蓋西漢始也巴渝鞞舞自魏始也拂舞白紵  
始晉或曰江左古辭也撰舞曲二卷漢雅舞一章魏  
雅舞四篇漢雜舞拂舞曲一章鐸舞巾舞二章魏鞞



舞曲五篇

雅舞歌辭

一曲

漢景帝紀制禮樂各有韻歌者所以發德也舞者所以明功也

武德舞歌

顯宗紀永平三年燕祭光武廟初奏文始五行武德之舞漢書曰文始舞者本舜韶舞也高祖六年更名文始其舞人執羽籥五行者本周舞也秦始皇二十六年更名五行其舞人冠冕衣服法五行色武德者高祖四年作言行武以除亂也其舞人執干戚光武草創禮樂未備今始奏之

東觀漢紀明帝永平三年八月公卿奏世祖廟舞名東平王蒼議以漢制宗廟各奏其樂不皆相襲光武皇帝撥亂中興武功盛大廟樂舞宜曰大武之舞乃進武德舞歌詩遂用之于光武廟焉

於穆世廟肅雍顯清俊乂翼翼秉文之成越序上帝駿奔來寧建立三雍封禪泰山章明圖讖放唐之文休矣

惟德罔射協同本支百世永保厥功

樂府一日世祖廟登歌

序曰武德舞歌於穆頌世祖武功成也休矣惟德以下戒後王法祖周頌之遺

樂府廣序

卷之十八終

男

爾邁謹訂

樂府廣序目次 卷之十九

魏雅之變二

雅舞歌辭 四曲

昭武舞歌

矛俞新福歌

弩俞新福歌

安臺新福歌

行辭新福歌

樂府廣序目次

卷之十九終

樂府廣序

卷之十九

浙西止谿園人朱嘉徵論正

魏雅之變二

雅舞歌辭

魏志文帝受禪改漢安世樂為正世嘉至樂為迎靈昭容樂為昭業漢巴渝舞為昭武雲翹舞為鳳翔育命舞為靈應武德舞為武頌文始舞為大韶五行舞為大武明帝太和初詔議廟樂改大予樂為太樂太祖武皇帝樂曰武始之舞高祖文皇帝樂曰咸熙之舞烈祖皇帝樂曰章斌之舞凡此三舞天地宗廟薦享及朝饗用之總名大鈞之樂王肅等議設官縣之樂八佾之舞高皇大帝太祖高祖文昭廟皆當兼用先代及武始大鈞之舞以文始大武武德武始大鈞可以備四代之樂猶周存六代之樂也故奏黃鐘舞文始以禮天地奏太簇舞大武以祀五郊明堂奏姑洗舞武德巡守以祭四望山川奏蕤賓舞武始大鈞以祀宗廟二至祀丘澤可兼舞四代又漢雲翹育命之舞舊以祀天今可兼以雲翹祀圓丘育命祀方輿于壇

樂府廣序

卷之十九

雅舞曲

樂府詩集卷之五  
澤卒如肅議

# 昭武舞歌

晉書樂志巴渝舞漢高帝所作也高帝自蜀漢將定  
三秦閬中范因率賁人從帝爲前鋒及定秦中封因  
爲閬中侯其俗善歌舞高帝樂其猛銳數觀其舞曰  
武王伐紂歌也後使樂人習之閬中有渝水因其所  
居故曰巴渝舞舞曲有矛渝弩渝安臺行辭  
宋書樂志魏渝兒舞歌四篇魏國初建所用使王粲  
改造其辭爲矛俞弩俞安臺行辭新福歌曲行辭以  
述魏德後于太祖廟並歌之

## 矛俞新福歌

漢初建國家匡九州蠻荆震服五刃三革休安不忘備  
武樂修宴我賓師敬用御天永樂無憂子孫受百福嘗  
與松喬遊烝庶德莫不咸懽柔

右曲一韻十二句  
氏樂苑

樂府載雜舞曲左本同今從梅

弩俞新福歌

材官選士。劔弩錯陳。應桴蹈節。俯仰若神。綏我武烈。篤我淳仁。自東自西。莫不來賓。

右曲一韻八句

安臺新福歌

武功既定。庶士咸綏。樂陳我廣庭。式宴賓與師。昭文德。宣武威。平九有。撫民黎。荷天寵。延壽尸。千載莫我違。

右曲一韻十一句

宋書武作我

行辭新福歌

神武用師。士素厲仁。恩廣覆猛。節橫逝自古。立功莫我弘。大桓桓。征四國。爰及海裔。漢國保長慶。垂祚延萬世。



右曲一韻九句  
謹按魏以建國之舞薦之九廟爲變雅也

序曰魏昭武舞歌矛俞弩俞安臺行辭四曲頌魏公也魏公樂已行武以安天下焉及晉改宣武舞武舞也後改正德舞按晉志以漢巴渝舞本歌曲四篇其辭旣古莫能句讀魏初乃使祭更造其辭蓋當時作頌手無出仲宣右者余讀之肅肅穆穆中亦有應桴蹈節俯仰若神之態與傳武仲舞歌伯仲

樂府廣序

卷之十九終

男 爾邁謹訂

樂府廣序目次 卷之二十

漢雅之變 四

雜舞歌辭 四曲

拂舞曲

淮南王篇

鐸舞歌

聖人制禮樂篇

巾舞歌

公莫舞

散樂

俳歌辭

樂府廣序

卷之二十目次

漢雅、雜舞曲

樂府廣序目次

卷之二十終

樂府廣序

卷之二十

浙西止谿圃人朱嘉徵論正

漢雅之變四

雜舞歌辭

通志自漢樂舞寢盛有雅舞有雜舞雅舞者郊廟朝饗所奏文武二舞是也雜舞者公宴已訖繁舞鞀舞鐸舞拂舞白紵之類是也謹按雜舞散樂雖作于殿廷並雅之變

拂舞曲

淮南王篇

崔注淮南王淮南小山之所作也淮南服食求仙過禮方士遂與八公相攜俱去莫知所在小山之徒思戀不已乃作淮南王之曲焉

淮南王自言尊百尺高樓與天連後園鑿井銀作牀金

瓶素縷汲寒漿。汲寒漿飲少年。少年窈窕何能賢。揚聲  
悲歌音絕天。我欲渡河河無梁。願化雙黃鵠還故鄉。還  
故鄉入故里徘徊故鄉苦身不已繁舞寄聲無不泰。徘  
徊桑梓遊天外。

樂府列拂舞曲

集考自言尊宋書作自尊言

序曰。雜舞曲歌淮南王著戒也。按史記稱淮南好  
劍。則八公之徒。不過劍俠耳。王之反謀。積四十二年  
而不能發。卒自剄死。豈真有形解之術耶。是篇風刺  
甚隱明。是伍被輩久繫不能歸漢。一雪自訟。一若諷  
諫鮑明遠詩。朱門九重門九闔。願逐明月入君懷。可  
謂得其志而樂府何以列之拂舞曲。余讀觀舞賦言。

客有觀舞于淮南者豈淮南俗好歌舞而托舞曲以寓言之歟拂舞曲盛于晉蓋專言舞矣

### 鐸舞歌

唐書樂志鐸舞漢曲也

### 聖人制禮樂篇

晉書樂志鐸舞詩二篇陳于元會樂錄鐸舞者所持也木鐸制法度以號令天下故取以爲名

昔皇文武邪彌彌舍善誰吾時吾行許帝道銜來治路  
萬邪洽路萬邪赫赫意黃運道吾治路萬邪善道明邪  
金邪善道明邪金邪帝邪近帝武武邪邪聖皇八音偶  
邪尊來聖皇八音及來儀邪同邪鳥及來儀邪善草供  
國吾咄等邪鳥近帝邪武邪近帝武邪武邪應節合用

武邪尊邪應節合用酒期義邪同邪酒期義邪善草供  
國吾咄等邪鳥近帝邪武邪近帝武武邪邪下音足木  
上爲鼓義邪應衆義邪樂邪邪延否已邪鳥已禮祥咄  
等邪鳥素女有絕其聖鳥鳥武邪

樂府列鐸舞歌詩

序曰鐸舞曲歌聖人制禮樂元會之雅也按宋書樂  
志鐸舞曲獨有句逗今從之

巾舞歌

公莫舞

唐書樂志公莫舞音宋謂之巾舞其說云漢高祖與  
項籍會鴻門項莊舞劍將殺高祖項伯亦舞以袖隔  
之且語莊云公莫莫苦楚人相呼曰公言公莫害漢王  
也漢人德之故舞用巾以像項伯衣袖之遺式樂錄

巾舞古有歌辭訛異不可解。

吾不見公莫時吾何嬰公來嬰姥時吾哺聲何爲茂時  
爲來嬰當恩吾明月之士轉起吾何嬰土來嬰轉去吾  
哺聲何爲土轉南來嬰當去吾城上羊下食草吾何嬰  
下來吾食草吾哺聲汝何三年鍼縮何來嬰吾亦老吾  
平平門淫涕下吾何嬰何來嬰涕下吾哺聲昔結吾馬  
客來嬰吾當行吾度四州維四海吾何嬰海何來嬰四  
海吾哺聲煇西馬頭香來嬰吾維道五吾五丈度汲水  
吾意邪哺誰當求兒母何意零和錢健步哺誰當吾求  
兒母何意哺聲三鍼一發交時還弩心意何零意弩心  
遙來嬰弩心哺聲復相頭巾意何零何邪相哺頭巾相



吾來嬰頭巾母何何吾復來推排意何零相哺推相來  
嬰推非母何吾復車輪意何零子以邪相哺轉輪吾來  
嬰轉母何吾使君去時意何零子以邪使君去使來嬰  
去時母何吾思君去時意何零子以邪思君去時思來  
嬰吾去時母何何吾吾

樂府列巾舞歌詩

南齊書樂志音公莫舞歌二十章章無定句前是第  
一解後是第十九解二十解雜有三句並不可曉解  
建武初明帝奏樂至此曲言似是永明樂流涕憶世  
祖云不知卽是此曲否。

序曰巾舞歌公莫舞德項伯也主業艱難示後世不  
忘其章。

散樂一曲

序曰散樂者雜舞樂曲之變也郭茂倩列之樂舞白紵霓裳柘枝諸曲之後云余考周禮旄人教舞散樂唐樂志云散樂者非部伍之聲俳優歌舞雜秦蓋漢書黃門名倡是也漢有黃門鼓吹天子所以宴羣臣蓋雅樂之外又有宴私之樂焉穀梁傳曰魯定公會齊侯于夾谷罷會齊人使優施舞于魯君之幕下樂記子夏對魏文侯之問曰新樂進俯退俯俳優侏儒優雜子女然則散樂之所從來者不旣遠乎自漢武帝通西域諸國通貢及黎軒之善眩人獻于漢是時天子大設抵出奇戲諸恠物令外國客徧觀傾駭之及加眩者之工而設抵奇戲歲增變甚盛益興自此

始此散樂所繇獨盛于漢歟及讀郭氏近代樂序凡  
燕樂諸曲天寶間著樂者十四調又有梨園別教院  
法歌樂十三曲而隋開皇初文帝制七部樂清商居  
一。西涼高麗天竺安國龜茲文康居其六煬帝益以  
康國疎勒爲九部唐十部樂增高昌秦漢以來名爲  
雜伎其變非一。南宋爲鳳凰銜書伎唐爲熱戲樂並  
西漢魚龍百戲之流風焉南齊侏儒導引人自歌之  
魏晉故事皆然至隋文帝以其非正典罷去固已度  
越前規者矣舊傳俳歌古辭八曲前一篇二十二句  
今侏儒所歌節取之也存散樂一章

俳歌辭

俳不言不語呼俳喻所俳適一起狼率不止生拔牛角

摩斷膚耳馬無懸蹄牛無上齒駱駝無角奮迅兩耳

樂府古辭一曰俳儒導自古有之蓋倡優戲也

樂錄梁三朝樂第十六設俳技歌云見俳不語言俳

澀所俳作一起四坐敬止馬無懸蹄牛無上齒駱駝

無角奮迅兩耳半折半博四角恭時

武帝紀元封三年作角抵戲文穎曰角抵兩兩相當

角力角技藝射御蓋雜技樂也巴渝戲魚龍曼延之

屬後更名平樂觀哀帝雅性不好聲色時覽下射武

戲蘇林曰手搏爲下角力爲武戲也

序曰雜舞歌俳戲樂也新聲代變古樂亾矣散樂

盛于殿廷始于漢之平樂觀而魏晉故事並有侏儒

導引如霓裳舞馬至唐開元而極然自北朝宣武而

後宋書稱其屈茨琵琶五絃空侯沙羅鎗鎔撈箏新

靡聽者無不悽愴泣下按其源並出西域也聞者莫

不奢淫躁競舉止輕颺情發于中不能自止信哉

樂府廣序

卷之二十一終

男 爾邁謹訂

樂府廣序目次 卷之二十一

魏雅之變 三

雜舞歌辭

聲舞歌 五曲

聖皇篇

靈芝篇

大魏篇

精微篇

孟冬篇

樂府廣序目次

卷之二十一終

樂府廣序

卷之二十一

浙西止谿園人朱嘉徵論正

魏雅之變三

雜舞歌辭

宋書樂志鞞舞未詳所起然漢魏已施于燕享矣傅毅張衡所賦皆其事也魏曹植新猷五篇晉鞞舞歌亦五篇並陳于元會樂錄鞞舞梁謂之鞞扇舞卽巴渝是也鞞扇器名也鞞扇上舞作巴渝弄至鞞舞竟豈非巴渝一舞二名向異公莫亦名巾舞也漢曲五篇一日關東有賢女二曰章和二年中二日樂久長四曰四方皇五曰殿前生桂樹並章帝造魏曲五篇一明明魏皇帝二太和有聖帝三魏歷長四天生蒸民五爲君旣不易並明帝造以代漢曲其辭並亡陳思王又有五篇一聖皇篇以當章和二年中二靈芝篇以當殿前生桂樹三大魏篇以當漢吉昌四精微篇以當關中有賢女五孟冬篇以當校兔按漢曲無漢吉昌校兔二篇疑樂久長四方皇是也

樂府廣序

卷五

魏雅

雜舞曲



鼙舞歌

五曲

本序曰漢靈帝西園鼓吹有李堅者能鞞舞遭亂西  
隨段熲先帝聞其技召之堅既中廢兼古曲多謬訛  
故改作新歌五篇

聖皇篇

聖皇應歷數正康帝道休九州咸賓服威德洞八幽三  
公奏諸公不得久淹留蕃位任至重舊章咸率繇侍臣  
省文秦陛下體仁慈沈吟有變戀不忍聽可之迫有官  
典憲不得顧恩私諸王當就國璽綬何累縈便是舍外  
殿官省寂無人主上增顧念皇母懷苦辛何以爲贈賜  
傾府竭寶珍文錢百億萬采帛若煙雲乘輿服御物錦  
羅與金銀龍旂垂九旒羽蓋參班輪諸王自計念無功

荷厚德思一効筋力靡軀以報國鴻臚擁節衛副使隨  
經營貴戚並出送夾道交輜輶車服齊整設鞞鏐耀天  
精武騎衛前後鼓吹簫笳聲祖道魏東門淚下霑冠纓  
拔蓋因內顧俛仰慕同行行將日暮何時還闕庭車  
輪爲徘徊四馬躊躇鳴路人尙酸鼻何況骨肉情

右樂府載雜舞曲左本闕曲凡五韻五十句

序曰鞞舞曲歌聖皇親侯建國蕃衛王室也傳曰侯  
衛賓服威則可畏德則可懷五章從宋志同爲饗燕  
之雅追述分社立國惓惓忠愛如聞行葦之秦思  
王忠厚之至也

靈芝篇

靈芝生王地朱草被維濱榮華相晃耀光采瞠若神古  
時有虞舜父母頑且嚚盡孝于田壠烝烝不違仁伯瑜  
年七十綵衣以娛親慈母笞不痛歔歔涕霑巾于蘭少  
失母自傷早孤毀刻木當巖親朝夕致三牲暴子見陵  
侮犯罪以亾形丈人爲泣血免戾全其名董永遭家貧  
父老財無遺舉假以供養傭作致甘肥責家填門至不  
知何用歸天靈感至德神女爲秉機歲月不安居嗚呼  
我皇考生我旣已晚棄我何其早蓼莪誰所興念之令  
人老退詠南風詩灑淚滿襟抱亂曰聖皇君四海德教  
朝夕宣萬國咸禮讓百姓家肅虔庠序不失儀孝悌處  
中田戶有曾閔子比屋皆仁賢耆耄無天齒黃髮盡其

年陛下三萬歲慈母亦復然

右曲凡五韻四十八句

序曰聲舞曲歌靈芝和德之感也下以誠格之上以德孚之德以召和罔不應焉靈芝朱草與大雅之棫樸榛楛同爲盛德之感澤被萬類不與爲私而尤異之材首應之有典有則與漢司馬相如鄒子樂輩齊驅矣

大魏

大魏應靈符天祿方甫始聖德致太和神明爲驅使左右安供養中殿宣皇子陛下長壽者羣臣拜賀咸悅喜積善有餘慶寵祿固天嘗衆喜填門至臣子蒙福祥無

患及陽遂輔翼我聖皇衆吉咸集會凶邪姦惡並滅亡  
黃鵠遊殿前神鼎周四阿玉馬充乘輿芝蓋樹九華白  
虎戲西除舍利從辟邪騏驥躡足舞鳳凰拊翼歌豐年  
大置酒玉樽列廣庭樂飲過三爵朱顏暴已形式宴不  
違禮君臣歌鹿鳴樂人舞鼙鼓百官雷抃讚若驚儲禮  
如江海積善若陵山皇嗣繁且熾孫子列曾玄羣臣咸  
稱萬歲陛下長壽樂年御酒停未飲貴戚跪東廂侍人  
承顏色奉進金玉觴此酒亦真酒福祿當聖皇陛下臨  
軒笑左右咸懽康杯來一何遲羣僚以次行賞賜累千  
億百官並富昌

宋書寵作榮右曲凡六韻五十句

序曰鼙舞曲大魏朝會食舉侑食之雅也與上陵  
有所思同篇制離合亦雅似之

精微篇

精微爛金石至心動神明杞妻哭死夫梁山爲之傾子  
丹西質秦烏白馬角生鄒衍囚燕市繁霜爲夏零關東  
有賢女自字蘓來卿壯年報父仇身沒垂功名女休逢  
赦書白刃幾在頸俱上列仙籍去死獨就生天倉令有  
罪遠徵當就拘自悲居無男禍至無與俱緹縈痛父言  
荷擔西上書盤桓北闕下泣淚何漣如乞得并姊弟沒  
身贖父軀漢文感其義肉刑法用除其父得以免辯義  
在列圖多男亦何爲一女足成君簡子南渡河津吏廢

舟船執法將加刑女媚擁權前妾父聞君來將涉不測  
淵畏懼風波起祭名川備禮饗神祇爲君求福先  
不勝醺祀誠至今有罰艱君必欲加誅乞使知罪誓妾  
願以身代至誠感蒼天國君高其義其父用赦原河激  
奏中流簡子知其賢歸聘爲夫人榮寵超後先辯女解  
父命何況健少年黃初發和氣明堂德教施治道致太  
平禮樂風俗移刑措民無枉怨女復何爲聖皇長壽考  
景福嘗來儀

右曲凡四韻六十四句

序曰輦舞曲歌精微君子燕樂不忘忠告焉靈芝其  
感自上下以誠應之精微其誠自下而上感之所謂

葵藿之傾葉。太陽雖不爲之迴光。然終向之者。誠也。  
或曰。曲爲明帝時作。帝性嚴急。督修宮室。有稽限者。  
言猶在口。身首已分。王肅諫曰。人命至重。難生易殺。  
是以聖賢重之。蓋寓規言表爲大雅遺音。精微二  
句。義冠全篇。絕是漢人節奏。

孟冬篇

孟冬十月。陰氣厲清。武官誡田。講旅統兵。元龜襲吉。元  
光著明。蚩尤蹕路。風弭雨停。乘輿啟行。鸞鳴幽軋。虎賁  
承騎。飛象珥鵠。鐘鼓鏗鏘。簫管嘈喝。萬騎齊鑣。千乘等  
蓋。山填谷平。林滌藪張。羅萬里盡。其飛走趨。趨狡兔。  
揚白跳翰。獵以青骹。掩以修竿。韓盧宋鵠。呈才騁足。噬



樂府廣序

卷三

魏雅

樂舞曲

五

不盡縹牽麋倚鹿魏氏發機養基撫弦都盧尋高搜索  
猴援慶忌孟賁陷谷超巒張目決鬚髮怒穿冠頓熊扼  
虎蹴豹搏羆氣有餘勢負象而趨獲車旣盈日側樂終  
罷役解徒大饗離宮亂曰聖皇臨飛軒論功校獵徒死  
禽積如京流血成溝渠明詔大勞賜大官供有無走馬  
行酒醴驅車布肉魚鳴鼓舉觴爵擊鐘醕無餘絕綱縱  
麟麕弛罩出鳳雛收功在羽校威靈振鬼區陛下長懽  
樂永世合天符

右曲凡九韻六十句

序曰擊舞曲孟冬以時田獵示不荒也當漢艾如  
張漢鼓吹曲爲朝會燕射之歌未嘗全用諛詞魏

猶近古予建作。頌中有規吐辭成響其文則微可謂  
氣變絲桐志形金石者

樂府廣序

卷之二十一終

男

爾邁謹訂

樂府廣序目次 卷之二十二

漢頌一

郊祀樂章 一十九章二十曲

練時日

帝臨

青陽

朱明

西颢

玄冥

惟泰元

天地

日出入

天馬 二曲

天門

景星

齊房

后皇

華燿燿

五神

朝隴首

象載瑜

赤蛟

靈芝歌

封禪頌

四章

自我天覆

般般之獸

濯濯之麟

宛宛黃龍

東都五詩

明堂詩

辟雍詩

靈臺詩

寶鼎詩

白雉詩

論功歌

樂府廣序

卷之二十二

浙西止谿圃人朱嘉徵論正

漢頌

詩序頌者美盛德之形容以其成功告于神明者也  
今遵之。

謹按漢明帝定樂爲四品。一曰大予樂。郊廟上陵用之。二曰雅頌樂。辟雍饗射用之。宋鄭樵謂其雅頌通歌者是也。其大予及月令迎氣樂歌。僅見篇目。其歌不傳。余次第其篇。一曰郊祀。一曰廟祀。而以封禪頌明堂辟雍五詩附于郊祀之後。仍其初制焉。郭氏樂府先郊祀歌。安世樂大饒歌。次相和曲。余以風雅頌更定之。遵先制也。左克明止錄饒歌三調。不載郊廟樂章。未詳其指。而鄭漁仲以安世樂非嘗所奏。不列于正聲。豈云得所哉。余首序兩漢頌辭。爲南北朝三唐之冠。

序曰王者承天之序。事莫大乎祀。祀莫大乎樂。夫帝王殊世不相沿樂。其所用于郊廟朝廷以接神人之

歡者傳之金石。彤之綴兆。各因其功德。治亂之所起。而本原風俗之所繇。可述而志者。周爲備焉。若昊天有成命。郊祀天地之樂歌也。清廟祀太廟之樂歌也。我將明堂之樂歌也。載芟良耜。籍田社稷之樂歌。漢繼周承。秦更制郊廟。未有定儀。大率襲秦舊。魏晉以下。同用漢儀。周書所謂。肇稱殷禮之義也。孝武帝定郊社祀。泰乙于甘泉。祭后土于汾陰。而四望六宗。皆得醊食。泰時壇旁。典禮未稱。成帝時。始定南北郊兆。匡丞相建議。饗帝貴誠。尚質埽地而祭。歌大呂舞雲門。以娛天神。歌太簇舞咸池。以娛地祇。建武中。興葢亦用元始儀云。樂府之立也。因郊社作十九章。五郊

互秦兩京同用之。房中祠樂十七章。高祖時唐山夫人所作。孝惠二年。使樂府令備其簫管。更名安世樂。本周房中樂之遺。秦名壽人。班志。凡樂樂其所生。禮不忘本。高祖樂楚聲。房中樂楚聲也。魏黃初中。以房中風化天下。改爲正始樂。總襲更爲享神歌。異矣哉。且魏自有廟樂也。建安十八年。操爲魏公。加九錫。始立宗廟。令王粲作顯廟頌。文帝受禪。後更名太廟頌。余考五郊房中顯廟諸聲。功德略見歷代因之。實頌辭。而史氏譏其未諧鐘律。豈其德化未洽。雅樂不可以遽興者耶。世祖撥亂反正。定天邑。卽位三十年。顯宗繼統。政教清明。四裔承風。遣子入侍。列侯公卿之



子皆入小學。然後宗祀明堂。三雍養老。功德甚光。美而永平三年。述爲登歌。僅一章耳。郊祀則同用先漢歌。魏武一匡之烈。風開六代。其廟頌三章。及昭武舞歌。安和有節。無褒大自功。如南北朝者。可不謂謹凜歟。初漢制郊廟樂也。奏嘉至。猶古降神之樂。奏永至。以爲行步之節。猶古采齊肆夏也。登歌清廟之歌。再終。奏休成。卒奏永安。美神明既享。禮以成也。其雅舞有二。文武是也。蓋以德相尚。武德舞者。高祖四年作。象天下樂已行。武以除亂也。文始舞。本舜招舞五行。本周大武。明有制。示不相襲也。四時孝文所作。明有法。示天下之安和也。又作昭容樂。禮容樂。昭容者。猶

古之昭夏也。主出武德舞。禮容者。主出文始。五行舞。志曰。舞人無樂者。將至至尊之前。不敢以樂也。出用樂者。言舞不失節。能以樂終也。建武以來。營北郊明堂。辟雍。靈臺。明堂者。明政教之堂。辟雍。所以行禮樂。宣德化也。靈臺。天子所以觀天人之際。陰陽之會也。正月上辛。郊別祀地祇。以薄太后配。永平初。以光武帝配五帝。迎時氣。五郊之兆。青帝句芒。歌青陽舞雲翹。赤帝祝融。歌朱明舞雲翹。黃帝后土。先立秋十八日。樂奏黃鐘之宮。歌帝臨舞雲翹。育命白帝蓐收。歌西皓舞育命。黑帝玄冥。歌玄冥舞育命。皆八佾。車服各如其方色。冕而執干戚。所以養時訓也。典禮始備。

乃與孝武帝建漢家封事等。故封禪頌東都五詩。得與郊廟頌並列云。余聞聲音之道。與政通焉。故曰宮亂則荒。其君驕。商亂則搃。其臣壞。角亂則憂。其民怨。徵亂則哀。其事勤。羽亂則危。其財匱。而漢制猶爲近古。凡二至陰陽晷景長短之極。微氣之所生也。令八能之士八人。或吹黃鐘之律。鼓黃鐘之瑟。宮處于中。左右爲商。徵角羽。先之三日。太史謁之。至日。夏時四孟冬。則四仲。其氣至焉。先氣至一刻。乘輿親御臨軒。安體靜居以聽之。合五音律。先唱五音。並作二十五闕。皆音以等。八能士各書板言事。甲乙日冬至黃鐘之音。調君道得。孝道褒商。臣角民徵。事羽。物各一板。

否則召太史令各板書封以皂囊送西陛跪授尚書  
施當軒北面稽首拜上封事日夏至禮亦如之蓋律  
和聲故律和則氣和氣和則聲和而諸福之物來傳  
其治化隆焉事典皆可爲後世法故詳述之明非魏  
晉以下所可及也

# 郊祀樂章

十九章二十曲

漢書禮樂志武帝定郊祀之禮祠太一于甘泉就乾  
位也祭后土于汾陰澤中方丘也乃立樂府采詩夜  
誦有趙氏秦楚之謳以李延年爲協律都尉多舉司  
馬相如等數十人造爲詩賦畧論律呂以合八音之  
調作十九章之歌

晉書蕭子雲曰南郊樂歌二漢同用五郊互奏之

宋書樂志漢武頗造新歌然不以光揚祖考崇述正  
德但多詠祭祀及祥瑞而已今按其首練時日曰靈  
之來靈之至迎神也帝臨五章歌五帝也泰元三章  
統頌天地而日出入言人命不能安固武帝願乘黃

之休下。如黃帝之升而僊也。其後或紀瑞應或祝神。鐘赤蛟曰禮樂成。靈將歸。則送神之曲也。

徐師曾文辨武帝南北五郊之制未復。非禮也。今考其歌如帝臨惟泰元。天地后皇四章。則祀太乙后土之樂也。如青陽朱明西顯玄冥五神五章。則祀五時之樂也。如練時日。天門華燿燿三章。則天地通用之樂也。其餘五章。則又郊廟之所通用。蓋其歌雜肄于太樂。非一祭始末之文。

練時日一

練時日。候有望。炳膺蕭延四方九重。開靈之府。垂惠恩。鴻祐休靈之車。結玄雲。駕飛龍。羽旄紛靈之下。若風馬。左蒼龍。右白虎。靈之來神哉。沛先以雨。般裔裔靈之至。慶陰陰。相放怫。震澹心。靈已坐五音。飭虞至旦。承靈億。牲繭栗。黍盛香。尊桂酒。賓八鄉。靈安留。吟青黃。徧觀此。眺瑤堂。衆婢竝綽奇。麗顏如茶。兆逐靡。被華文。厠霧縠。

曳阿錫。珮珠玉。俠嘉夜。茝蘭香。澹容與。獻嘉饗。

右本辭十二解三言四十八句

集考禮樂志注練選也。般班同。震澹動也。虞樂也。億安也。四方八鄉皆言神也。吟歌誦青黃四時之樂也。衆婢供神女樂並好麗也。府細縉錫細布也。俠狹同。嘉夜芳艸也。澹安也。管朶彫反。燭人說反。馬莫補切。叶虎蘭香詩紀作芳。

唐王珪議曰祭天以烟爲歆神之始。祭地以埋爲歆神之始。宗廟以灌爲歆神之始。故曰大祭有三始。燭管蕭延四方是也。

序曰練時日迎神也。本大雅抑之篇神之格思不可度思惟神無方索神者亦無方也。一曰祀太一之樂也。按漢志武帝初定郊祀之禮祠太一祭后土則歌練時日。帝臨二曲。

帝臨二

帝臨中壇。四方承宇。繩繩意變。備得其所。清和六合。制數以五。海內安寧。興文偃武。后土富媪。昭明三光。穆穆優游。嘉服上黃。

集考爾雅繩繩戒也。匱偃同上。尚同。顏注帝天神之尊者。劉邠指天子臨祠謬甚。張晏云歌后土也。土數五。故稱數以五。土色黃。故上黃。傳玄地郊辭。靈無遠。天下母是富媪解。

序曰帝臨祠太乙后土之歌也。武帝郊雍曰今上帝親郊而后土無祠。則禮不答也。于元鼎四年立后土祠于汾陰。按史記樂書此曲不與四歌同用。後漢永平中迎時氣五郊之兆黃帝后土先秋十八日樂奏黃鐘之宮。歌帝臨則同用之。

春陽開動。根莖以遂。膏潤并愛。跂行畢逮。霆聲發榮。壙處頃聽。枯槁復產。迺成厥命。衆庶熙熙。施及天貽。羣生堪堪。惟春之祺。

漢書並鄒子樂辭

集考跂行言行之有足者。壙穴也。蜚蟲驚聽也。枯槁言草木之零落者。堪堪與湛湛露斯同。豐厚貌。祺福也。施音弋。堪徒感反。上聲。

史記樂書春歌青陽夏歌朱明秋歌西颵冬歌玄冥禮記天子乃以元日祈穀于上帝。乃擇元辰躬耕帝籍。反執爵于太寢。命曰勞酒。仲春命民社祠于高禘。乃鮮羔開冰。先薦寢廟。季春天子乃薦鞠衣于先帝。是月也天子布德行惠。勉諸侯。聘名士。禮賢者。后妃親蠶以共郊廟之服。

序曰青陽春歌也。後漢志立春之日迎春東郊祭青

帝句芒歌青陽。讀六代時五帝升歌希逸以數紀

聲。子山以舞配祖。玄暉高調。休文雅音。咸自名家而



頌體肅穆深遠之風方斯邈矣。

朱明四

朱明盛長專與萬物桐生茂豫靡有所詘敷華就實既  
阜既昌登成甫田百鬼迪嘗廣大建祀肅雍不忘神若  
宥之傳世無疆

集考楊子云師哉師哉桐子之命桐幼穉也師古云  
桐讀爲通言草木皆通達而生茂豫美盛而光悅也  
甫田大田也百鬼百神迪進也嘗謂歆享之若順專  
古敷字。

禮記孟夏農乃登麥仲夏大雩以祁穀實天子羞含  
桃先薦寢廟季夏土潤溽暑殺草冀田疇美土疆

序曰朱明夏歌也後漢志立夏之日迎夏於南郊祭  
赤帝祝融歌朱明詩之甫田豳雅也豳侯夏省耘  
因而雩祭周禮天子雩上帝諸侯以下雩上公此歌

言登成甫田百鬼迪嘗則天子所有事也。

### 西顓五

西顓沆碭秋氣肅殺含秀垂穎續舊不廢姦僞不萌祆孽伏息隅辟越遠四貉咸服既畏茲威惟慕純德附而不驕正心翼翼。

集考西方少昊也沆碭白氣貌不榮而實曰秀葉未日穎四貉四裔也沆胡浪反碭音蕩廢合韻音發辟讀僻。

禮記是月也天地始肅農乃登穀天子嘗新先薦寢席仲秋乃命有司申嚴百刑斬殺必當無或枉撓季秋大饗帝嘗天子乃教于田獵以習五戎。

序曰西顓秋歌也後漢志立秋之日迎秋於西郊祭白帝蓐收歌西顓余觀月令之文王者順時行德耳方金行播氣鄒子曰姦僞不萌正心翼翼蓋言安

攘歸於主德也。中四句自近及遠。末四句繇末遡本。去周頌何遠。

### 立冥六

立冥陵陰蟄虫蓋藏。山木零落。抵冬降霜。易亂除邪。革正異俗。兆民反本。抱素懷樸。條理信義。望禮五嶽。籍飲之時。掩收嘉穀。

右五章並章四言十二句

集考。立冥。北方之神也。條。分也。暢也。山。古草字。

禮記。孟冬。大飲烝。天子乃祈來年于天。宗廟先祖五祀。勞農以休息之。仲冬。命有司。土事毋作。事欲靜。以待陰陽之所定。季冬。始漁。先薦寢廟。天子乃與公卿大夫共飭國典。論時令。以待來歲之宜。

序曰。立冥冬歌也。後漢志。立冬之日。迎冬於北郊。祭黑帝。立冥歌立冥。本歌條理信義句。似經詩希逸。

飾國典閉關梁。却似傳望禮五嶽。句似綱謝玄暉合  
國吹響蜡賓。又似目故頌詩可以論世。

### 惟泰元七

建始元年丞相匡衡奏罷鸞路龍鱗更定詩曰。消選  
休成。

惟泰元尊。媼神蕃釐。經緯天地。作成四時。精建日月。星  
辰度理。陰陽五行。周而復始。雲風雷電。降甘露雨。百姓  
蕃滋。咸循厥緒。繼統共勤。順皇之德。鸞路龍鱗。罔不胥  
飾。嘉籙列陳。庶幾宴享。滅除凶災。烈騰八荒。鐘鼓竿笙。  
雲舞翔翔。招搖靈旗。九。賓將。

右四言章二十四句。

集考。蕃。多也。釐。福也。皇。天也。言天子繼祖順天也。勝  
震也。言振整而飾之。畫招搖于旗以征伐。日靈旗。將  
從也。鸞。讀。其。讀。恭。章。合。韻。音。鄉。

序曰。惟泰元。武帝祠太一之樂也。繼統以下。王者法天地之德。文德武功。並寓於此。按泰元。卽太乙也。漢志。太極元氣。含三爲一。言三才未分。包而爲一。此謂媼神。蕃禧也。或云。元尊天也。媼神地也。下經緯天地。文復難讀矣。

天地八

匡衡奏罷黜繡周張更定詩曰。肅若舊典。

天地竝況。惟予有慕。爰熙紫壇。思求厥路。恭承禋祀。縕豫爲紛。黼繡周張。承神至尊。千童羅舞。成八溢。合好効懼。虞泰一。九歌畢奏。斐然殊鳴。琴竿瑟會。軒朱璆磬。金鼓靈其有喜。百官濟濟。各敬其事。盛牲實俎。進聞膏神。

奄畱臨須搖長麗前揆光耀明寒暑不忒况皇章展詩  
應律銷玉鳴函宮吐角激徵清發梁揚羽申以商造茲  
新音永久長聲氣遠條鳳鳥鵠神夕奄虞蓋孔享

右雜言章二十七句

集考光陽也熙興也路降神之路也溢俗同列也虞  
娛同軒朱卽朱軒合樂于此進聞音以蕭炳脂芬達  
于神所也奄同淹須搖須臾也長離孟康注長庚星  
璣曰靈鳥陰陽和所以賜君章賢德也銷鳴玉聲火  
元反函合同發梁卽繞梁以下總言五聲之備耳鵠  
古翔字享叶鄉

序曰天地虞太一而登歌也按惟泰元統天神地  
示者故此曲承以天地並况下似責成主嚙帝王耳  
曰惟余有慕曰思求厥路此爲帝者禋祀之本厥路  
者天道也卽皇章也不過如寒暑不忒而止則其所

以況之者不亦正大無私者乎。易曰。正大而天地之情可見矣。郊祀志。人有上書天子祠三一。天一。地一。泰一。天子許之。令太祝領祠泰一壇上。天地況疑祀天一地一之歌。沈休文樂志云。泰元三章。統頌天地者。本兩漢通用之說也。

### 日出入九

日出入安窮。時世不與人同。故春非我春。夏非我夏。秋非我秋。冬非我冬。泊如四海之池。徧觀是耶。謂何。吾知所樂。獨樂六龍。六龍之調。使我心若瞿黃。其何不徠下。

右雜言章十三句

集考。同冬。龍爲韻。若讀惹與下叶。嘗咨同。黃。乘黃。神馬也。晉灼曰。日月無窮而壽命有終也。泊如至徧觀爲句。言壽命不能安固。如四海徧觀。是知世長命。

促應劭曰武帝願乘六龍仙而升天乘黃龍翼而馬身黃帝乘之而仙歟乘黃不徠下也一注並誤

序曰日出入郊之祭日也記云迎長至之日大報天而主日又曰日月星辰民之所瞻仰也則祭之封禪書天神貴者太一惟泰元是也曰經緯天地作成四時精建日月周而復始以是爲泰元之德故歌天地次之歌日月又次之漢郊儀太乙壇居中五帝各如其方其下四望六宗之神薦特爲醑食四望日爲之長故曰郊之祭日也按春非我春至所樂六龍以上歸德於太一之辭六龍之調以下勉王者法日也歸德於太一者何陰陽太一之動靜也日月爲之御而四時行焉時世積焉然日月不與爲功故曰徧觀



是耶謂何夫登崑崙之上而後知日月相避隱爲光  
明遊四海之外而後知日月以四瀛爲池六龍爲御  
彼亦一無窮豈同人間世以千秋萬歲爲春秋哉世  
人則拘目見幾忘太乙之德而獨樂六龍六龍者日  
出入是也勉王者法日云何若順也法日之行焉於  
泰元曰順皇之德於日出入曰使我心若其義一也  
乘黃疑從六龍之調轉下天馬歌耳故下章亦承太  
一況來二雅都有此章法宋樂志亦承劭注之誤余  
不敢妄和

天馬十

太一況天馬下。霑赤汗沫流赭。志倣儻精權奇。衛浮雲。

掩上馳體容與逝萬里今安匹龍爲友

右三言章十二句

集考南陽新野有暴利長武帝時遭刑屯田嶽煌界數千渥洼水傍見群野馬中有奇者與凡馬異來飲此水利長先作土偶持勒鞞于水傍後馬翫習久之代土偶持勒鞞收得其馬獻之欲神異之云從水中出也西域傳曰大宛國多善馬馬汗血言其先天馬

注簡音躍。逝音逝。超越也。一讀厲。

序曰太一况元狩三年馬生渥洼水中作也

天馬來從西極涉流沙九□服天馬來出泉水虎脊兩  
化若鬼天馬來歷無皐經千里循東道天馬來執徐時  
將搖舉誰與期天馬來開遠門竦予身逝昆侖天馬來  
龍之媒游閭闔觀玉臺

右三言章二十四句

集考皐即皐漢書樂府作皐太歲在辰曰皐徐梅在

遙遠也。一曰。奮搖高舉。予。武帝也。帝好神仙。嘗庶幾其俟乘之。登昆侖閭闔。天門。玉臺。上帝所居。劉勰曰。天馬以騷體製歌。

序曰。天馬來。太初四年。誅宛王。獲宛馬。作也。史記。汲黯云。王者作樂。上以承祖宗。下以化兆民。今陛下得馬。詩以爲歌。協於宗廟。先帝百姓。豈能知其音耶。觀黯之言。則是歌宗廟亦用之矣。以下爲群祀樂歌。班志所謂巡守福應之事者。

天門十一

天門開。誅蕩蕩。穆並騁。以臨饗。光夜燭。德信著。靈寢平。而鴻長生。豫太朱涂廣。石爲堂。飾玉梢。以舞歌。體招搖。若永望。星畱僉。塞隕光。炤紫幄。朱煥黃幡比。被回集。

貳雙飛嘗全月穆穆以金波日華耀以宣明假清風軋  
忽激長至重觴神喪回若留放殪冀親以肆章函蒙祉  
福嘗若期寂滲上天知厥時泛泛溟溟從高旂殷勤此  
路臚所求佻正嘉吉弘以昌休嘉砰隱溢四方專精厲  
意逝九閼紛云六幕浮大海

右雜言三十五句

郭樂府信作音

集考星經天門二星在左角南四星之北天子待朝  
聘賓客之所星明謂之天門開則四口歸化不見則  
兵革起開津不通誅讀如迭蕩蕩天體堅清之狀  
下並言神之臨祠也浸言神德澤所浸溥博無私其  
福甚大故我得長生之道而安豫也涂通神之路飾  
以朱丹又密石爲堂也玉梢舞者以玉飾竿招搖申  
勅之貌永長也望叶人俞答也言衆星畱神答我享  
薦也煩卽煩幅此言舞者如鳥之迴翅而雙集也獲  
古披字張羽貌揚雄賦被桂椒而鬱移楊嘗羊猶逍  
遙宜偏也軋忽長遠貌重觴累獻也殪音覲言神裴  
回不去我得覲之冀親附而陳誠意遂章明也下言

神之應誠而至。不以高遠隔。泛泛上浮意。渾渾盛也。佻讀聲始也。神隱盛意。閔作垓重也。謂九天之上。六幕六合也。

序曰。天門開。郊之徧歌。四望也。漢平晏劉歆之議曰。四望者。日月星海也。三光高而不可得親。海廣大無限界。故其樂同於祀天。按日出入。頌日之德。同於天。天門頌四望之應。同於日。故曰。兪答其貺。卽周禮大司樂。樂六變而天神皆降時也。文辨謂此天地通用之樂。殊未然。下章景星象興。俱言瑞應異此。

### 景星十二

武帝本紀。元鼎四年夏六月。得寶鼎。后土祠旁。作寶鼎之歌。

景星顯見。信星彪列。象載昭庭。日親以察。參侔開闔。爰

推本紀。汾睢出鼎。皇祐元始。五音六律。依韋饗昭。雜變  
並會。雅聲遠姚。空桑琴瑟。結信成。四起遞代。八風生殷。  
殷鐘石羽。簫鳴河龍。供鯉醇犧。牲百末旨酒。布蘭生泰。  
尊柘漿析朝醒。微感心攸通。修名周流。嘗羊思所并。穰  
穰復正直往。甯馮螭切和疏。寫平上天布施。后土成穰。  
穰豐年四時榮。

右雜言章二十四句

起詩紀作興

集考。景星德星也。見無嘗嘗出有道之國。鎮星爲信  
星。居國益地象縣象也。載事也。伴等也。言鼎瑞參等  
于上世也。依靠諧和也。饗讀響言聲饗之明也。空桑  
地名。出善木。可爲琴瑟。四典舞者。四縣代奏也。河龍  
夏之所賜者也。醉謂色不雜。百末百草華之末也。事  
見春秋繁露。芬香布列。若蘭之生。析解也。言柘漿可  
以解朝醒。攸遠也。嘗羊猶逍遙也。思所并思與神道  
合也。下言合所思言獲福既多。歸于正道。克當往日  
之所願也。甯願也。馮口。河伯也。黃螭龜屬也。言馮口

命靈螭使切厲詣和水神。今之疏導川潦爲散平均無災害也。睢音雖。祐音佑。殷音隱。寧合韻音寧。螭音攜。

序曰。景星元鼎五年。汾陰得鼎作也。按元封二年郊雍五帝。還拜祝太一。亦有德星昭衍之文。故爲神鼎之瑞。夫神不可度。仁人孝子。嘗以思合之。湯頌曰。綏我思成是也。自爰熙紫壇。思求厥路。至於周流。嘗羊思所并。又恭翼翼合所思。蓋無往而不與神道通矣。馮□疏川澹災事。似因鼎出汾陰而及之。

齊房十三

武帝紀。元封二年夏六月。甘泉宮內中產芝九莖連葉。作芝房之歌。

齊房產草。九莖連葉。宮童効異。披圖按譜。玄氣之精。回

復此都蔓蔓日茂芝成靈華

右四言章八句

武帝詔書曰。上帝溥臨。不異下房。賜朕弘休。

集考。瑞應圖。王者敬事者老。不失舊故。則芝草生。齊讀齋。玄天也。都雲陽之都。謂甘泉也。

序曰。齊房元封二年。芝生甘泉作也。齊房歌典重。殊不及詔書。當時武帝作宣房詩。鴻筆也。諸臣莫及此等盛事。何不入頌。

### 后皇十四

后皇嘉壇。立立黃服。物發冀州。兆蒙祉福。沈沈四塞。假狄合處。經營萬億。咸遂厥宇。

右四言章八句

集考。壇。祭壇服。祭服也。假狄。遠口。合處。內附也。宇。居也。言我經營萬方。故得各遂其居。沈。音哀。流行貌。假。讀遐。

樂府黃亭

卷五

漢頌

郊祀樂章

七



序曰。后皇天子祭后土於汾陰之樂也。元鼎四年立后土祠於汾陰。因戒助祭臣工之詩。是時侯王牧伯及四□君長咸在駿奔。示之以無外之規。如此卽商之封建厥福。周之式序在位也。膏灼解猶爲汾鼎作頌者誤。

### 華燧燧十五

華燧燧。固靈根。神之旂。過天門。車千乘。敦昆侖。神之出。排玉房。周流雜。拔蘭堂。神之行。旌容容。騎沓沓。般從從。神之徠。泛翼翼。甘露降。慶雲集。神之愉。臨壇宇。九疑賓。夔龍舞。神安坐。鵷吉時。其翼翼。合所思。神嘉虞。申貳觴。福滂洋。邁延長。沛施祐。汾之阿。揚金光。橫泰河。莽若雲。

增揚波徧臚驪騰天歌

右三言章十八句

集考華燿燿固靈根言芝也沛施祐汾之阿揚金光橫泰河言曲也敦讀屯聚也拔舍止也從音總衆也般相連也掄引也九疑舜所葬言以舜爲賓客養典樂龍納言皆隨舜而舞以樂神也共讀泰虞樂也貳觴重觴也泰河大河也臚陳也騰升也言陳其歡慶令歌之上升也

序曰華燿燿郊太一后土祝釐之所通歌也一曰齊房生芝汾陰得鼎祀神者合歌之按楚茨神嗜飲食歌乃云神之愉神安坐夫人能得神之去來者鮮矣况其喜怒嗜欲乎傳曰仁人爲能享帝視此汾之阿汾陰也昆侖明堂也帝在明堂中一殿四面複道有樓從南面入名曰昆侖

五神十六

五神相包四隣。土地廣揚浮雲。屹嘉壇椒蘭芳璧玉精。垂華光益億年。美始興交於神。若有承。廣宣延咸畢觴。靈輿偃蹇驤。并汨臚析奚遺。滌淥澤淫然歸。

右三言章二十句

集考五帝爲太一相也四隣四方也屹摩也并汨疾意言速自陳列分散而歸無所畱也淫久也淥澤澤名歸饗者自謂也

宋皇祐中宋祁疏曰天雖一神迭王于五時非五帝各一神也歲九祭皆主于天至日圓丘正月祈穀五時迎氣孟夏雩季秋饗凡九惟至日其禮最大故稱曰昊天上帝昊天者以體稱上帝者以義舉禮大故也其餘則否至于大雩祈百穀之雨大享穀百穀之成以五帝者有生成之功所報之禮闕一不可雖止一神並陳五位不知神之于彼乎于此乎是其德也

序曰五神五帝祝釐之歌也五帝太乙之佐武帝祠

之太乙壇旁環居之各如其方故泰元爲太乙之神而五神爲五帝也前神嘉虞此交於神若有承並從祭者之心見之下二解正申此指說文澤卽汪注注陂也蓋神之將歸如在上如在旁祭者之誠意未散

### 朝隴首十七

朝隴首覽西垠雷電祭獲白麟爰五止顯黃德圖匈奴  
熏鬻極闢流離抑不詳賓百僚山河饗掩回轅鬻長馳  
騰雨師洒路陂流星隕感惟風籥歸雲撫懷心

右三言章二十句郭樂府一曰白麟歌集考祭古僚字祭祭五時皆有報應聲若雷光若電也止足也白麟足有五趾強窮也流離不得其所者爲開道路使之安集違道不詳善者則抑斥之以申懲勸也百僚百神之官也籥音鄉鬻音構長貌路陂路傍也懷心懷柔之心也箴音籥

樂凡月  
序曰元狩元年冬十月行幸雍獲白麟作也以祀隴  
首之神武帝北伐疆南誚勁越置郡數十通譯  
萬里故騰雨師感惟風頗有日靖四方氣象末句撫  
心自考頌中寓規

象載瑜十八

象載瑜白集西食甘露飲榮泉赤雁集六紛員殊翁雜  
五采文神所見施祉福登蓬萊結無極

右三言章十二句

集考象載瑜黑車也白集西雍之麟也甘露榮泉天  
之所降地之所出也員音云翁雁頸也西合韻音先  
劉勰曰赤雁羣篇靡而非典

序曰象載瑜太始三年行幸東海獲赤雁作也

赤蛟十九

赤蛟綏黃華蓋露夜零晝晡濫百君禮六龍位勺椒漿  
靈已醉靈既享錫吉祥芒芒極降嘉觴靈殷殷爛揚光  
延壽命永未央杳冥冥塞六合澤汪濊輯萬國靈祀祀  
象輿轡票然逝旗逶蛇禮樂成靈將歸托玄德長無衰

右三言章二十八句

集考黃華蓋言上有黃氣狀若蓋晡烏感反濫音煩雲氣百君百神也勺讀酌芒芒廣大也輶和也祀音近不安欲去也輶音儀僕人嚴駕待發票匹遙反輕舉意也。

謹按自天馬至此凡十章一切瑞應多歸于太乙之祀而雜頌之。

宋書樂志後代郊祀樂府多做之大都本騷九歌招魂故其辭幽淡峻絕。

序曰赤蛟綏送神之曲也。先儒謂周頌之詞約約所以爲嚴盛德故也。魯頌之詞侈侈所以爲夸德不

樂府古辭附郊祀歌 卷三 二  
足故也。以余觀於漢魏登歌詞，稍縱矣。其氣猶嚴。六代以下，失之夸矣。

### 靈芝歌

因靈寢兮產靈芝。象三德兮瑞應圖。延壽命兮光此都。配上帝兮象太微。參日月兮揚光輝。

樂府古辭附郊祀歌

### 封禪頌

史記本傳：司馬長卿奏言封禪事，其略曰：夫修德以錫符，奉符以行事，不爲進越。故聖王弗替而修禮地，祇謁款天神，勒功中嶽，以彰至尊，乃作頌曰：

自我天覆，雲之油油。甘露時雨，厥壤可遊。滋液滲漉，何生不育。嘉穀六穗，我穡曷蓄。非惟雨之，又潤澤之。非唯

徧之我汜布濩之萬物熙熙懷而慕思名山顯位望君  
之來君乎君乎侯不邁哉

一章章四言十八句

集考說文滲漉水下流貌徧史記作濡布史記作漉  
古布字汜普也史記無我字侯何也

般般之獸樂我君囿白質黑章其儀可嘉  
嗃嗃穆穆君子之能蓋聞其聲今觀其來厥塗靡蹤  
天瑞之徵茲亦於舜虞氏以興

二章章四言十二句

集考般音班謂騶虞也嗃音戛和也穆穆敬也能漢  
書作熊蹯作從亦作爾舜時百獸率舞薛道衡文  
足足懷仁般般擾義般般麟也足足鳳也說文鳳鳴  
節節足足

濯濯之麟游彼靈時孟冬十月君徂郊祀馳我君輿帝



樂府廣序

卷三

樂府章

六

用享祉。三代之前。蓋未嘗有。

三章章四言八句

集考武帝祠五時獲白麟。

宛宛黃龍興德而升。采色炫燿。燿炳燿煌。正陽顯見。覺悟黎烝。于傳載之。云受命所乘。厥之有章。不必諄諄。依類託寓。諭以封禪。

四章章四言十二句

右見詩紀郭氏樂府闕

周

詩遺軌同載

集考漢土德黃龍見成紀。燿音晃。漢書作燿。燿音魂。正陽南面受朝也。

序曰。封禪頌美王道。告成功於天也。太史公樂書。

今上佐十九章。令侍中李延年序次其聲。蓋刺其非。

頌聲不載其詞。于長卿封禪書則述之列傳。其聲清。

穆和昶。允爲周頌之遺。

東都五詩

明堂詩

後漢志建武中初營北郊明堂別祀地祇以高皇后配奏樂亦如南郊

於昭明堂明堂孔陽聖皇宗祀穆穆皇皇上帝宴饗五位時序誰其配之世祖光武普天率土各以其職猗歟緝熙允懷多福

一章章四言十二句 福讀偏

通考王者聽朔必于明堂淳于登謂在國之陽明堂位成王朝諸侯四門君長咸列四門之外則明堂在國之外矣

辟雍詩

明帝永平中上始躬養三老五更于辟雍行大射之禮郡縣道行鄉飲酒于學校皆祀聖師周公孔子于是七郊禮樂三雍之儀備矣

乃流辟雍。辟雍湯湯。聖王蒞止。造舟為梁。皤皤國老。乃父乃兄。抑抑威儀。孝友光明。於赫太上。示我漢行。洪化惟神。永觀厥成。

二章章四言十二句

集考。詩傳造舟。謂連舟為浮梁。三雍。應劭云。辟雍明堂。靈臺。雍。和也。言天地君臣人民皆和也。漢官儀。大射于曲臺。音灼曰。天子射宮也。西京無太學。于此行禮。

### 靈臺詩

章帝元和初。為靈臺十二門作詩。各以其月祀而奏之。

乃經靈臺。靈臺既崇。帝勤時登。爰考休徵。三光宣精。五行布序。習習祥風。祁祁甘雨。百穀蓁蓁。庶草蕃廡。屢惟豐年。於皇樂胥。

三章章四言十二句

### 寶鼎詩

東觀漢紀永平六年。廬江太守獻寶鼎。出上雒山。陳鼎于廟。

嶽修貢兮川效珍。吐金景兮歆浮雲。寶鼎見兮色紛緼。  
煥其炳兮被龍文。登祖廟兮享聖神。昭靈德兮彌億年。  
四章章六句

### 白雉詩

後漢書永平十年。白雉所在出焉。章帝詔。乃者白鳥神雀屢臻。

啟靈篇兮披瑞圖。獲白雉兮效素鳥。嘉祥阜兮集皇都。  
發皓羽兮奮翹英。容潔朗兮於純精。彰皇德兮侔周成。  
永延長兮膺天慶。

五章章七句

右見東都賦班固辭

郭樂府闕

序曰五詩歌明堂辟雍靈臺寶鼎白雉漢中興頌也  
大雅弘達尚乎西京通志同郊祀十九章列於正  
聲蓋頌體也

### 論功歌

后土化育兮四時行修靈液養兮元氣復冬同雲兮春  
露膏澤洽兮殖嘉穀

右見漢書班固辭樂府闕

序曰論功歌后土也

樂府廣序

卷之二十二終

男

爾邁謹訂